



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8



Nepal PM Prachanda-i confidence vote agitsü



FIFA-i Israel nokdangtsü telemtetba magiteter

VOL. XXI ISSUE NO. 215 (ADOK 215) DIMAPUR

KÜPTOKNÜ (SATURDAY)

MONUPII (MAY) 18, 2024

₹ 5.00

NDPP-i 8 buba foundation day among Municipal And Town Council Election 2024 atema metetdaksür



Chingwang Konyak (file)

Dimapur, May 17, 2024 (TYO): May 17, 2024 nü Nationalist Democratic Progressive Party (NDPP) 8 buba Foundation Day mongogo.

"Party züngsem ajak tenü nung ni Nagaland nung alir ajak dangi tepela salem abener. May 17, 2017 nü "Facta non Verba" Deeds not Words nung ajemdaker NDPP ya political party ka ama tenzük aser küm 8 tashi arur. Iba atema Tsüngrem nem tenünsang, tetushi aser sentsüwangshi ajunga agütsür" ta NDPP president Chingwang Konyak-i ashi.

"Nagaland nung alirtem political party tem dang nungi balaka temelenshi taginüba den putepa NDPP tenzük. Political party tasen ka, alima tereprangtsü den maitsü ka ta ser NDPP tenzük" ta pai ashi.

"NDPP tenzükba nungi tanü tashi tayongzükba aika ajurua arur saka party züngsemtemi bendanga agütsüba aser meranga inyakba ajanga party alizüngtem aser nükjidongtem tongteta inyakteta arur. Nagaland state nung alirtemi pusema nungitba

ajanga dang NDPP takok ma nung arur aser iba atema kanga pelar" ta Chingwang-isa ashi.

"Tesüiba küm 8 tsüngda Nagaland nung general elections (2018&2023) ana aser NLA by-election tem ajuruogo saka menden kar nungbo NDPP den tetokteper shinga mali takok angu. Ano 1 Nagaland parliamentary constituency (2018) aser Lok Sabha elections (2019 & 2024) ana nung NDPP-i dang takok nguogo" ta President-isa ashi.

"Political party tasen ka süaka NDPP-i tayongzükba ajak ajangteta 18 buba Lok Sabha 2024 election nunga takok angutsü. NDPP-i takok ngua aruba ya Tsüngrem ajanga lir aser party züngsemtemi bendanga agütsüba, masetshii noktakba aser meranga ajanga lir" ta Chingwang Konyak-isa metetdaksü.

Paisa Bharatiya Janata Party (BJP)-i NDPP pusema nungitba atema tenünsang agütsü.

"Chief Minister aser NDPP Parliamentary Board züngsemtemi kü lenisüba nung pusema nungitba den ano party tajungba akümtsü asoshi shilem agiba atema kanga pelaba metetdaksür" ta NDPP President-i ashi.

"NDPP-i Nagaland nung alirtem dang nangzükba ataloktsü atema teinyaktsü aika lir anungji Nagaland senso ajak dang NDPP aser sorkar pusemtsü mepishir. Asenok ajak longjemer State of Excellence kümdaksüdi" ta paisa ayongzük.

NBSE-i SS aser Science TLMs indang metetdaksür

Dimapur, May 17, 2024 (TYO): Nagaland Board of School Education (NBSE)-i Class X nung Social Sciences aser Science subject atema Teaching and Learning Materials (TLMs) renemogo.

TLMs ya kaketshirtem tali angazüktsü atema renemogo aser NBSE portal <https://www.nbsenl.edu.in> (under Information- Curriculum & Syllabus) nungi download sütetsü ta NBSE-i metetdaksü.

Registered Institutions tekolakpurtemi subject teachers aser kaketshirtem dang TLMs osang lemsateptsü aser amshitsü ayongzüktsü atema NBSE-isa metetdaksüogo.

Manipur nung arua jenoktsüsa aküm. Iba mapang Assam Rifles unit temi parnok len tom nung sot.

UNLF(P) züngsem 34-i prangpongtem bener Assam Rifles tsüngdang temai adok. Iba sülen parnok ajak Manipur police ket nung agütsüogo.

November 29, 2023 nung United National Liberation Front UNLF (P)-i Centre aser Manipur sorkartem den ceasefire agreement agia lir.

UNLF(P) züngsem 34-i AR tsüngdang temai adok

Imphal, May 17, 2024 (Agencies): Manipur nung United National Liberation Front (People's) züngsem 34-i Assam Rifles ket nung bendanga agütsüogo.

UNLF(P) telungpurtem ya Myanmar nungi Manipur-i arutsü merangdang Myanmar tsütsü parnok den rarartemi injang khaloktsü.

Myanmar nung People's Defence Force (PDF)-i parnok den khatem aser iba jagi parnok

Dimapur, May 17, 2024 (TYO): State Election Commissioner, Nagaland-i Municipal & Town Council, 2024 election atema temetetsü kar metetdaksüogo.

Nagaland Municipal Act 2023 nung SEC-i Recognized National & State Parties, Registered - Unrecognized Parties aser Free Symbols indang osang metetdaksü.

State Election Commission-i Municipal and Town Council, 2024 election atema National Parties, State Parties aser symbols agizükba metetdaksü.

1. Aam Aadmi Party-Broom
2. Bahujan Samaj Party-Elephant (Assam dak alaka States/U.T.s ajak nung amshitsü, Assam nungbo candidate temi free symbols nungi shimtsü)
3. Bharatiya Janata Party

-Lotus
4. Communist Party of India (Marxist) - Hammer, Sickle and Star
5. Indian National Congress-Hand

b) Nagaland nung State Parties aser symbols respectively;

1. Naga Peoples Front - Cock
2. Nationalist Democratic Progressive Party - Globe
3. Lok Janshakti Party (Ram Vilas)- Helicopter
4. Nationalist Congress Party - Clock
5. Nationalist Congress Party (SharadchandraPawar# Pending Final Order of the Hon'ble Supreme Court of India) - Man Blowing Turha#

c)Tanga state tem nungi State Parties aser symbols;
1. National Peoples Party -

Book
d) State ka nung recognized süa aliba State Party kati Election Symbols (Reservation and Allotment) Order, 1968 kübok reserved symbol amshitsü akok ta shia 1. Nagaland Congress -Dao

2. Rising People's Party-Pen Nib with Seven Rays
3. United Naga Democratic Party- Hat

e) The Free Symbols.

Almirah, Flute, Auto-Rickshaw, Gas Stove, Bat, Letter Box, Battery Torch, Plastering Trowe, Belt, Ring, Binoculars, Safety Pin, Box, Scissors, Calculator, Sewing Machine, Camera, Spanner, Computer, Table, Cutting Pliers, Trumpet, Diamond, Violin, Dish Antenna, Water Tank, Ear Rings, Whistle, Envelope, Wool and Needle.

Assam Medical College, Dibrugarh nung nisungtem ashioktsür

Dibrugarh, May 17, 2024 (Agencies): Dibrugarh nung aliba Assam Medical College nung tiyongtsü nung mapa inyakertem aser medical personnel tsüngda tesentaktep yur nisungtem ashioktsüba inyakyim ka putetogo.

Parnoki Assam Medical College nung temang anepalutsü atema arurtem blood banks aser pathological tests tenüng amer nija laboratories-i yok.

Shirangertem aser parnok kinungertem Assam Medical College den sendaktepa aliba nija pathological laboratories-i yok aser iba ya tiyongtsü nung inyakertem ajanga inyak. Parnoki nisungtem nija laboratories-i yokba atema sen meshia agi.

Küm aika shirangertem, talisa sensakertem iba scheme ajanga ashioktsüogo. Doctor temi shirangertem pathological tests balala agitsü ashi aser iba

mapangji tiyongtsü nung inyakertem AMC telongtet nung aliba nija laboratories kari parnok anir ao.

BJP Dibrugarh district president Ujjwal Kashyap densema nisung aikati iba inyakyim aitsür. Iba onük ya social media sabang balala nung prokshi aser iba ajanga Assam Medical College ketdangsurtemi telangzüba ka agütsütsüsa aküm.

NGHSSEA-i sorkar school tem aser tesayurtem tushi

Kohima, May 17, 2024 (Agencies): Nagaland Government Higher Secondary School Employees Association (NGHSSEA)-i Hokolbarnü Higher Secondary School Leaving Certificate (HSSLC) exam 2024 nung takok tajung anguba tesayurtem nem tetushi agütsüogo.

HSSLC examination 2024 nung GHSS Naginimora, GHSS Chumoükedima aser Rüzühkhrie GHSS Kohima ajanga 100% pass percentage nguteta liasü. Sorkar school nungisa toppers 3 aser subject toppers 9 liasü.

Tanü Dr Neilhouzhü Kire GHSS Seikhasou, Kohima nung NGHSSEA mungdang den tenünsang agütsüba sentong ayonga agia liasü.

Commissioner and Secretary School Education & SCERT Nagaland Kevileno Angami-i o jembidang tesayurtemi meranga inyakba, bendanga agütsüba aser tenangzükba tajung yur inyakba atema pelaba metetdaksü.

Tesayurtem ya education

system nung tongshitem lir anungji kanga aroka shisadangtsüla aser tayongzükbatem koktettsüla ta lai ashi.

Tesayurtem ya classroom nung dang masü saka loktiliba nunga tesayurtem aser temelenshi bener arurtem lir ta Kevileno-isa ashi.

National Education Policy 2020 ajanga education melenshiogo anung tesayurtemi skills tajungba akümtsüla ta laisa ayongzük.

ACHIEVEMENT OF GHSS IN HSSLC EXAM 2024

GHSS with 100% result
GHSS Naginimora (Arts)
GHSS Chumoükedima (Arts)
Rüzühkhrie GHSS Kohima (Commerce)

3 years consecutive 100% result: GHSS Naginimora

HSSLC Toppers (Arts)
Top 5 (a): Biseli Sangtam (Mayangnokcha GHSS Mokokchung)

Top 5 (b): Ilanguale AZeliang (GHSS Chumoükedima)

Top 8: Chujai. P (Bautüing

GHSS Longleng)
Subject Toppers

Riigono Seyie (Automotive):
Teacher- Zubenthung N.Shitio (GHSS Medziphema)

Thujokhriito Keyho (Agriculture):
Teacher- Imlinungla Imti (Dr Neilhouzhü Kire GHSS Seikhasou)

Chujai P (Beauty & Wellness):
Teacher- Abinah Jamir (Bautüing GHSS Longleng)

Rebika Tamang (Retail):
Teacher- Ramhia (GHSS Peren)

Ruyilu D Vadeo (Health Care):
Teacher- Shesato Hoshi (GHSS Phek)

Pathsuthong (Tourism & Hospitality):
Teacher- Kilemsungla (GHSS Dimapur)

Nzanbeni C Shitiri (Lotha):
Teacher- Khonzani Tsanglao (GHSS Wokha)

Liboke Chishi (Sumi);
Teacher- Kaholi V Chishi (GT) GHSS Dimapur)

Ilanguale AZeliang (History):
Teacher- Aroko Nagi & Thonsenlo Magh (GHSS Chumoükedima)

Naga nüchiso asoshi tenzükla Wt.Sentimenla den sensaksem tatsüka



Mokokchung, May/ Monupii 17(TYO): Naga nungeri 1951 küm Plebiscite agiba anogo 'Women' telok nung teinyakdak liasüji tetsür telok nung tanishir tantsürtem den külemi nüburtem den Plebiscite takok ngutettsü asoshi ajungshia jembia aser inyaka liasü, ta Wt.Sentimenla-i Tir Yimyim dang ashi.

Wt.Sentimenla ya Longkhum nunger Wt.Takoyangba aser Ungmatsür Wt.Imnüksüla tena jala, la 1937 küm April 8 nü aso aser la tang küm 88 buba lir.

Tsürabur mapang Naga nungertem pei temeden wazüka yutettsü asoshi merangtepa inyakba tensa ka nung onok liasü, iba mapang ka nung odila Imdongdangba CID ajanga India nungeri apu aser arem leni anir or amena züker Ungma lushu nung anir adoka kaset, iba sülenjibo joko tali majungba agi ojala kena aremi jena orr yangji yimer den külemi küm ka shi Wazakiong ayong anasa camp yanglur jenoka ali, ta lai ashi.

Odila Imdongdangba kaseter külenji joko kangasa tali majung liasü, anungji ojala kena aremi jena ao aser obalaji odila Lipokmerener kidang Mongsen mepu nung ali, saka ano army-temi arem nung onok aliba camp-jia rongtoktsü. Iba

sülenji ano joko Army-temi Ungma yimji atsü anaben agi longbanga atsübanger aliba agi joko yimtaki metogoi dang alu rur kelen ano alu nung küm ana shi ali, ta ashi.

Tia ka-a alu rur asüba agi lanurtem nem tsük rudena alibaji semki nung sentaktsür kelen ibaji septeta chiyungba tanü itemji kanga dang menungra-a bilemteter ta laisa lemsatep.

Timtem teokrong ajungaji odila Nungsangoba Naga nunger linük tenzükba mechi liasü ta laisa shisem.

Wt. Sentimenla-isa tetsür telok nung madenba mapang Youth nung inyakba mapang India nunger dang atsüka arem nung Naga nüchiso anogosa among, 1950 sürta ka asüdang Ungma yimtak Grouping ali aser yangji Longsa, Kúpza aser Settsü nungi aruagi külemi ali aser iba mapang nungji Longsa, Kúpza aser Settsü yim asemji Army-temi rongtoktsü aser onok yim pezü külemi küm asem shi ali, ta shisem.

Women nung inyakdang Khensa lushu nung aliba Peace Camp nung Naga nunger adenshiba mapang nung Army aser India nunger nungi jenbuttsü mechi nung sentepi aor ama renenem Revival kensa tena ao, ano Yaongyimsen yimtak Naga

nüchiso mungdang tuluka amongdang adenba bilemteter, aser iba mungdang nung adentsü asoshi kanga tamburtem ajok amener gari nungi kangashia anizükbasa angu, ta Wt.Sentimenla-isa menungraseta lemsatep.

Women nung adenbaji ajanga timtema aika ajuru, tia kaa onok tetsürtem dak tashiyim mapa tamajunga meinyak aser rishikangshia masü, tazüngba tuluka mali Class-2 tashi dang azüng, saka kanga dang tia kaa Women nung inyakba maongka Naga nunger mungdang nung adentsü atema Kohima-i anaben aser ano Kohima-isa Phizo sür kelen Phizo kinüngtsü ajurutsü asoshi ken ao aser Kohima nung Longkhum nunger Tetemjenba-er kidang anener senzüba kangasa menungra-a bilemer ta laisa lemsatep.

Onok külemi opang ka süa Women nung inykerbo ajak iba alima toktsür ogo, saka Nagatsür onok mapang nung Women nung inyakerkem adenshia sentong akara ta angashi nungbo adentsü ta Wt.Sentimenla-isa la Naga nunger asoshi bilemba Tir Yimyim dang shipok.

Wt.Sentimenla ya 1968 küm Ungma nunger Wb.Imnajungshi den Ungma Arogo nung Rev.Takosüngba ajanga sati kuli tajung agi, jala ka aser jabaso ka nungi mezüng semchir 5 aser tanaben semchir 2 ta lir.

1974 küm May ita kinüngbo Imnajungshi sür kelen küm 37 amia lir tanaben 2012 küm February 3 nü Wb.Lemsemchiba den Marepkong Arogo nung Pastor Wb.R.Moa ajanga kibong akum aser kelen Ungma Watsü Telen nung inyak aser Marepkong Arogo Evangelist telok nung küm 12 inyaker tang tashibo temang nunga kecha tashitak aser timtem kecha mali anisüngzüka alira, ta lemsatep.

Monsoon Preparedness senden ka May 20 nü amentsü

Dimapur, Monupii/May 17 (TYO): Chief Minister aser Chiarman, NSDMA lenisüba kübok Monsoon Preparedness senden ka May 20, 2024 anüngdang 11:00 ako nungi tenzükla Chief Minister's Secretariat, Kohima nung amentsü, ta sangdong ka ajanga ashi.

Iba senden nung PWD (R&B), HG, CD&SDRE, Food & Civil Supplies aser Health & Family Welfare Departments temi infrastructure maintenance report agütsütsü aser iba mapang department shiai slides 5-6 tsüngta nung meyi mapang renemshia alitsü mera agibatem agütsütsü.

Iba senden nung PWD (R&B), H&FW, PHED, Rural Development aser Power indang Minister-in-charge tem aser Urban Development, Food & Civil Supplies, IPR aser NSDMA indang Advisor-in-charge tem adentsü ayongzükogo.

Kasa senden nung Chief Secretary, Director General of Police, Agriculture Production Commissioner, Principal Secretary, PHED; Commissioner & Secretary, H&FW; Commissioner & Secretary, Works & Housing; Commissioner & Secretary, Urban Development; Commissioner & Secretary,

Rural Development; Commissioner & Secretary, Power; Commissioner, Nagaland; Secretary, Food & Civil Supplies; Secretary, IPR; Director General Home Guards, Civil Defence & SDRF; Engineer-in-Chief, Power; Engineer-in-Chief, NPWD; Principal Director, H&FW; Chief Engineer R&B; Chief Engineer, Power; Director, Agriculture; Director, F&CS; Director, Urban Development; Director, Rural Development; Director, IPR aser NDRF aser NHIDCL nungi teshimtet nübu arua adentsü, ta sangdong ajangasa ashi.

Social Welfare Department Annual Officer's Conference kaogo

Dimapur, Monupii/May 17 (TYO): Social Welfare Department, Government of Nagaland indang Annual Officer's Conference sentong May 17, 2024 nü NBCC Convention Center, New Secretariat Road, Kohima nung agia liasü, kong Advisor, Department of Social welfare, Wangpang Konyak tongti tesemdang liasü.

Iba sentong nung jembidang Nagaland sorkari timtem nung alirtem yaritsü asoshi scheme balala yanglua aliba indang Advisor Wangpang Konyak-i ashi.

Social Welfare Department ya 1968 küm tenzük aser tang tashinung tetsür, tanur aser matamabensar temaba jenjangi ajungkettsü asoshi scheme balala yanglua inyaka arur, ta

pai ashi. Pai ketdangsurtem dang pai mapa jeret-pereta aser temulung agüja inyaksü aser nüburtemi timtem ajangshibatem reprangtsü ajungshia liasü.

Nagaland CM-i pa dak tamang kaa iba maongka agütsüba atema pelaba lemsatepa liasü.

Iba sentong nung Tosheli Zhimomi, Director, Social Welfare menden liasü aser Rev. Suhuto Chishi, Youth Secretary, NBCC ajanga sentong tenzükla sarasadem.

Kasa sentong nung Martha R. Ritse (IAS) Secretary, Department of Social Welfare ajanga o tatsüka jembia aser K. Wango Langsym, Deputy Director ajanga melepzüng o jembia liasü.

Kohima Press Club ajanga asükhu lemsatep

Dimapur, Monupii/May 17 (TYO): Taoba mapang Kohima Press Club (KPC) nung züngsema alisang Martemjen Imsong May 17, 2024 nü asüba osang angazüka temulung khuremer, ta KPC sangdong ka ajanga ashi.

COVID-19 pandemic marudang Martemjen ya KPC nung züngsem ka ama osang kaket ka indang osangbener inyaka liasü.

Pa ya sempet tajung aliba

lanur ka liasü, aser pai külem osangbener kanga akumtsüboa liasü, ta KPC ajanga ashi.

Pa asüba ya onok asoshi taoba mapang külem tenzükler dang masü saka tempur tajung ka samar alitsü. Par kibong den onoki asükhu lemsateper aser asen Tulusang Tsüngremi kinunger mulungjang nung tesuneptsüba agüngja ta sarasademtsür. Asür tanüla tesunep nung anisüngzükjang, ta sangdong ajangasa ashi.

Sanis nung Agripreneurship workshop ka agi

Dimapur, Monupii/May 17 (TYO): Wokha indang District Administration ajanga Nasha Mukta Bharat Abhiyaan kübok anogo ka Agripreneurship workshop sentong Sanis Multipurpose Hall, Wokha nung May 17, 2024 nü agia liasü.

Iba sentong ya ICAR Research Complex for NEH Region, Nagaland Centre aser ICAR-KVK, Wokha den lungjemer ayongzükla liasü.

Department balala nungi iba sentong nung shisalen sayurtem arua shilem agiba atema SDO (C) Sanis, L. Samuel-i pelaba lemsatepa liasü.

Iba sentong nung Dr. Aabon W. Yanthan, Scientist (Horticulture Vegetable Science) and In-charge of the

Agri-Business Incubation (ABI) Centre, Nagaland; Moaakum Pongen, CTO, ICAR-KVK, Wokha; Anuranjan Singh, Project Manager, Shishoi Oshom-ETF Cell, Wokha; Achio Kikon, District Manager, CSC e-Governance Services India Ltd., Wokha aser Medical Department nungi teshimtet nisungtemi o jembia liasü.

Iba workshop ajanga lanurtem atema agripreneurship schemes aser maongka balala aliba lemsatep aser Wokha Distroct nung temesepba mozü mamshitsü aser nüburtem anema aser pela alitsü tongtipang ta tangatetba nung jembia liasü.

Iba sentong nung Sanis area nungi lanur 55 arua shilem agia tajangzük balala ngua liasü.

Directorate of Industries & Commerce ajanga metetdaksür

Dimapur, Monupii/May 17 (TYO): Indian Institute of Handloom Technology, Jawahar Nagar, Khanapara, Guwahati nung July 2024 nungi tenzükla Handloom & Textile Technology nung küm ana Diploma Course agitsü atema application meshir.

Lateral Entry ajanga Second year (Third Semester) nung direct admission agitsü asoshi Nagaland nungi indigenous candidates ya 01-07-2024 tashinung arishi küm timba agi 24 asütsüla aser ST/SC candidate arishi küm 26 tashi asütsüla.

Candidate tem minimum qualifications ya HSSLC/SSLC mesüra Mathematics, Physics, Chemistry subject aliba kasa tatidang mesüra 10th pass + (2 years ITI) mesüra (10+2) + (2years ITI) asütsüla.

Nüngdakba osangtsüsang tejangja aser application forms ya Office of the Directorate of Industries & Commerce (Dev. Branch, First floor), Nagaland, Kohima nungi office mapang meshitettsü.

Form ya June 15, 2024 tashinung agütsütsüla aser calling letter balaka magütsütsü.



May 17, 2024 nü Rudrapur district nung police-i Kedarnath tekülem kidangi temeshi aini aoertem indang 'Char Dham Yatra' registration mita reprangdang tangokba noksa nung angur.

Nepal nunga India nung Everest aser MDH masala nokdang

New Delhi, Monupii/May 17 (Agencies): Tawa Hong Kong aser Singapore na nung India nung aliba company tem-Everest aser MDH-i yangluba masala tapu balala nokdangba sülen Nepal linükia item masala nokdangogo.

Item masala nung temang raksatsüsa chemical densema lir, ta tamalen Hong Kong aser Singapore nung ketdangsertemi metetdakja liasü.

Nepal nung Department of Food Technology & Quality Control-i India nung yangluba masala balala nung cancer adokdaksüba 'ethylene oxide' keta ali asü maliar tendangdar.

Osangbener den jembidang Nepal food technology department nung otongdar, Mohan Krishna Maharjan-i, "Everest aser MDH brand spices bener aruba nokdangogo. Onoki item masala market nung ayokba-a nokdangogo. Item masala nung temang nung timtem adokdaksütsüsa chemical tamajung densema lir,

ta osang prokba sülen onoki item masala nokdang," ta ashi.

"Item brand ana indang masala nung chemical tendangdar. Tetendangba report mangu tashi tenokdangba ya alitsü," ta Maharjan-isa metetdaksü.

MDH aser Everest na ya küm aika India nung kanga nungtugu brands lir. Parnoki Middle East linüktem densema alima tesem balalai masala yoker.

Parnoki yangluba tongtibang masala tem rongnung mersü powder, cumin, süngsüng, elaichi, laung, süngshi aser mixed spice densema lir.

Hong Kong nung Centre for Food Safety-i MDH indang product asem - Madras Curry Powder, Sambhar Masala Powder aser Curry Powder aser Everest Group indang Fish Curry Masala nung mesen südaksüba mozü densema aliba puteta liasü.

Yamaji Singapore nunga food regulator ketdangsertemi

company anaprongla indang masala nung cancer adokdaksüba carcinogenic ingredients densema aliba putetba sülen linük anaprong nung item masala nokdangogo.

'Ethylene oxide' ya nisung achitsü atema majung, aser iba ya mapang talangka achi nungbo cancer tashidak adokdaksütsü akok.

New Zealand, United States aser Australia linüktemia MDH aser Everest spices tendangdar, ta osang ka ajanga metetdaksü.

Linük kar nung item masala nokdangba sülen Spice Board of India-i bendang linüktemi India nung spices tajung yoktsü atema inyaksangshidar.

Techno-Scientific Committee-i processing facilities mita repranger aser tendangtsü atema samples bendener.

Food Safety and Standards Authority of India (FSSAI)-ia MDH aser Everest products tendangtsü atema tetuyuba agütsüogo.

India nung shilem 85-i climate change ajanga kongshiba jangjar

New Delhi, May 17 (Agencies): India nung survey ka nung shilem 85-ibo climate change ajanga kongshiba parnoki ajangshir, ta ashi aser iba nungjagi shilem 30 dak temaibo kanga tatsük, tzümetüng mesüra climate change dak sendakba kuli balala ajanga parnoki tesem melenshia alir mesüra tesem melenshitsü bilemdar, ta metetdaksü.

Yaküm September 5 nungi tenzüka November 1 tashi nung iba survey agi aser survey nungji India nung tain 2,178-i shilem agi. Shilem agirtem rongnung shilem 91-ibo parnoki alima tatsükba akümba agi shisa bulur, ta ashi.

Iba survey ya Yale Program on Climate Change Communication & CVoter-i agia liasü. Survey nung shilem 38-i, tesüiba küm ka tsüngda parnoki anogo nung khenbosa tzü tajemtsü temerük mangu ta ashi aser shilem 72-i anogo shia electricity thitema angur, ta ashi.

Shilem agir shilem 34-i tali

atsükba, tzünglu maruba, tzümetüng lendong buluba aser tanga kuli balala ajanga tesem melenshiogo mesüra melenshitsü bilemdangogo, ta ashi.

Geneva nung amenoka aliba Internal Displacement Monitoring Centre-i ashiba agi, 2023 küm India nung tsüngsang-mopung dak sendakba lendong balala ajanga India nung lakh 5 dak temabo linük telung nung tesem melenshia liasü aser 2022 küm nungbo India nung lakh 25 dak temai tesem melenshia liasü.

Yaküm India nung talisa Himachal Pradesh aser Uttarakhand state na nung tzümetüng lendong kanga bulua ataloka liasü.

Sikkim nunga tzütepang (dam) pokdangba ajanga nisung 100 dak tema asü.

2050 küm tashi nungbo India nung nisung million 148.3 (crore 14.83) bo climate change ajanga kanga mejungi kongshiba tesemtem nung alitsü, ta asadantgetdango.



May 17, 2024 nü Uttar Pradesh nung Haripur district kübok Rath jila nung Ato kilonser, Narendra Modi-i Swami Brahmanand nem akhüm agütsüdang tangokba noksa nung angur.

West Bengal nung Trinamool Congress lenir ka dak injang khaloktsü

Kolkata, May 17 (Agencies): West Bengal kübok Cooch Behar district nung TMC lenir ka dak injang khaloktsü, ta Hokolbarnü police-i metetdaksü.

Brihostibar aonung TMC lenir, Animesh Roy kidangi meyipa aruba mapang nung

mejangjaba nisung kari pa dak injang khaloktsü.

Tia kaa injang jagi Roy dak tepi nung dang khashi. Roy den külemi alisanga injang agi yiru.

Police-i bushisüngdang tenzükogo aser aibelenertem maitsü jangjateta aputsü

merangdar, ta police ketdangser kati metetdaksü.

"Onoki par kibong züngsem danga asüngdangyar, ajisüaka parnoki osang tejangja kecha mashir," ta paisa shisem.

Tang Roy district nung aliba nija nija hospital ka nung treatment agidar.

India aser Russia nati visa-free tourism atema tezüngzüktep agitsü

New Delhi, May 17 (Agencies): India aser Russia nati linük ana tsüngda visa-free tourism atema tezüngzüktep agitsü asoshi June ita nungi jembitsü.

Iba tezüngzüktep agitetra ibaji ajanga linük anaprongla nung tourism jenjang ajungkettsü.

Linük anati June ita nungi tenzüka iba atemaji o lemteptsü aser taküm küm tatembanglen tashi nungbo tezüngzüktep agitettsüa akok, ta osang ka ajanga metetdaksü.

Russia Ministry of Economic Development kübok Department of Multilateral Economic Cooperation and Special Projects nung director, Nikita Kondratyev-isa, Russia-Islamic World: KazanForum 2024 agiba osang tejangja metetdaksü. Iba sentong ya Kazan, Russia nung agia liasü aser iba sentong nung group visa-free trips atema-a jembio.

Kondratyev-i, "India nungi ketdangsertem den telung nung onoki amalitepa inyakdar aser onoki tezüngzüktep draft asütsü atema jembitsü. June ita nung mezüng parnok (India) den draft agreement atema jembitsü tebilemba lir aser taküm küm tatembanglen tashi nungbo tezüngzüktep agitsü tebilemba lir," ta metetdaksü.

Iba mapatong ya Russia asalentong shilem ka lir; koba ajanga international tourism aser cultural exchange ajungkettsütsü.

Taküm February ita nung ministry-i 2024 küm tatembanglen tashi nungbo India den visa-free tourism atema tezüngzüktep agitsü nükjiong lir, ta metetdakja liasü.

Russia nung visa-free tourism program ya India den dang masü. Yaküm August ita nunga Russia-i China aser Iran na den iba tezüngzüktep agitsü atema maparen tenzüka liasü.



May 17, 2024 nü Varanasi nung matamabensartemi Lok Sabha election nung vote agütsütsü atema nüburtem ajungshia shilem agidang tangokba noksa nung angur.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

MONUPII 18, 2024

Naga nunger tongtumbang lenjem

Naga nunger ajaki 1951 küm May 16 nü plebiscite agiba anogo bilemteta mungogo. Ibaji temenungratsüka aser temulung ashitsüka lir. Naga nunger asoshi tajung kaji iba tesüiba anogo nung atalokba aser lemtetba onük nungbo Naga nunger ajak longjemer saka Naga nunger asoshi majung kaji, iba anogomunga külemi memongtetsüsa asenok rongnung telemsa adoka lir. Iba jagi asenoki tesüiba anogotem indangbo kanga junga shitetter saka tarutsü anogotem asoshi lenisüba tajung ka magütsüteter. Ashi, mezüng Naga nunger plebiscite agiba, tang tashi mapa mekümteti kangshir süra ano Naga nunger yimten leniba ka kübok ano tanaben plebiscite agitettsüsa asenok longjema ali asüa koda jungla ta sasaseta bilemer. Ajisüaka, tanü asenoki tesüiba anogomung mamadoktsü atema amunger dang ashi, tanübo asenoki mangatetsüa akok, saka asenok atema Naga plebiscite tasenbaji Naga lima nung India temzüng kübok state assembly aser parliamentary election agiba ya kumadokogo. Iba election nung ya election nung tokteper shiai ni India senso tajung ka aser India yimten tashi aser India inük telongjem raksatsüsa kecha meinyaktsü ta peisasa tezüluba nung nangzüker tokteper. Kasaji, election nung shilem agia vote agütsürtema nisung shiai peisasa nia India senso ta nangzük nung dang electoral roll nung tenüng itettsü. Kodang itemji jungjunga shisadangdir, asenoki asenoksasa küm 74 jakdang NNC teloki anir plebiscite agiba to tamagitsü amato kümdaktsüogo ta angatettsü. Aji oda, joko asenoka koloni aotsüar shimtetsüsa yimten lenjem tongtumbang ka nung nokdaka lir. Joko, iba amaibo asenoka maotsüla, kechiyong Naga nunger yimten nüchiso bushirtem dena India temzüng kübok agiba election nung shilem agir. Aji oda, joko Naga lima nung India nisan tuluba tuluba songa aoba angur aser küm shia Naga nungertemi India nisan nem salem agütsür. Aji oda, akhidangbo Naga lima nung India nüchiso anogomung amungtsüba ya shisabolutsüka liasü saka tanü asüngbo kecha terendaktsü makai kümogo. Kasaji akhidangbo Naga yimten temeten indang Naga yimten lenirtemi jembia nübortem nem tangatetba agütsü, ajisüaka tanübo sen, ali, ki ase tashiyim agi akoktsüba indang jembirtem dang ashi, Naga yimten temeten indang jembir mali kümogo. Iba ama tensa tia ka nung asenoki Naga plebiscite anogomung bilemteta amungba yagi asenok mulungjang nung Naga yimten temeten indang jangjatsü nungdakba indang tangatetba agütsütsü imlar. Naga yimten nüchiso atema raradang asenokbo yim aser alu ajak rongdakdaksüba, yim asem pezü külemi yimtsüng ka nung puoka yudaktsüba, tebur taintem pua reshikangshiba aser tetsür tanurtem mezüngmeshia kangshiba anogotem toa plebiscite anogo bilemtetba ama mamai bilemtetla sang, tanü asenok Naga nungertem tangatetba aser nükjidong ka nung longjemtetla. Naga lima ya ka dang aser Naga nungertema kin ka dang, saka Naga lima nung kechikodaser president aser prime minister paikaya alitsü? Asenok president aser prime minister akümtsü atema Naga nunger tai maketba senti taküm paikato lalu asü? Asenokbo president aser prime minister akümtsü atema Naga nunger yamato India sepaitem nem reshikangshidaktsü asü? Joko, Naga lima nung Naga nunger yimten nüchiso bushiba telok aser government nung president aser prime minister-tem ajak anener Naga nunger longjemtetdak yimten lenjem kati arutsüla. Idangji, Naga lima nung India temzüng kübok alitsü nangzüker akümba government malitsüla. Idangji dang Naga nungertem asoshi tagitsü yimten telemtetba ka agitettsü. Iba amaji ka mesütetli süra, atangji, tai adokyonga amadoktsü masüji alima kümzüng 1918 nungi 1951 küm tashiji dangsa bilemtetsüsa adoktsü. Raraa-raraa, Naga yimten nüchiso tongpang ya bilemtetba mapang ka ama dang kumadokba ya ajaki shisadangdar asütsü imlar.

OLEMSABANG

Late Subongnuklu Taküm Otsü

Mrs. Meyisongla, Rtd. Deputy Director, Nursing Kohima.

(Yashi adok nungi...)

No.4: Mokokchung nong 1958 küm Private KG school ka lapok. Lanur tajong jenti iba school ajanga adokogo. Iba school board member tem:

1. Mr. Subongnuklu, Chairman – Mongsenyimti
2. R.C. Chitin, Secretary, Akhoya
3. **Managing Committee:-** Mangyangnokcha, Changki Arishingang, Chuchuyimlang Imonongba, Longjang Chubanongba, Longkhum

No.5: Mongsenyimti compound nong private M.E

school ka Sübong Middle School tenüng nong, ibai tesülen Govt.-i agir High school tashi upgraded sür amshidagi (Class X)

No.6: Ano Mokokchung nong Night Private College ka 1958 küm lapok itemi longjemer tenzük:

1. Mr. Subongnuklu – Chairman
2. Mr. R.C Chitten – Secretary
3. Mr. Temen Aonok – Member
- Mr. S.C Jamir – Ungma
- Mr. Arishingang – Chuchuyimlang
- Mr. Imnaonen – Akhoya
- Mr. Imlong Chang – Chang
- Mr. Hopingki Sangtam – Sangtam
- Mr. Imonongba – Longjang
- Mr. Mayangnokcha – Changki
- Mr. Khelhoshe – Sema

Ibai tesülen Government-i agi aser FAZAL ALI COLLEGE ta melen, Governor of Assam tenüng nong melen, iba college-i ya agi nubur jenti tajangzük ngua arudagi. Ibaji Nagaland nong mezüng college liasü. Alima matem tashi nungpu mapa aser jenjang tulu aketba senti rongsen aika Aotsür Aor aser Naga nonger asoshi bendena aser rezünga doktsü.

1. Lemang tajung aika loteta yutsü, lemang sudaka süngdong tajung atem.
2. Longmisa yimdak 1959 kum tzu pipe line mesuoktsü.
3. Mongsenyimti yimdak tzü pumping system agi tzü agutsü 1969 küm.
4. Mokokchung town map junga yanglushitsü.
5. Dr. Imkongliba Memorial Hospital Mokokchung nong yanglu.
6. Assam Rifle li nongi lazuka Kg school compound aser ki asü.
7. Ao Baptist tenla kimong
8. N.S.T aser Bazar Super Market Complex yanglu
9. Town nong L.P school aser High school ground yanglushi.
10. Air field Dakota anentsu yanglu

Alima toa asüdong item mapa tajong ajak inyak saka par kiji sector road kupok septsülen tokta ki telaka room 3, tebuttsü tena room, tanur tebur 4 atema room tela ka, tetsür chanu 6 atema room telaka, sitting room telaka, merang dongloka asü. Bathroom, latrine telaka separate joka metenloka asü roomtemji mang manger. Compound mali, aji dang pai par atema rongsen kecha mebenden. Pai town teyong nung R.C.C ki tajong asutsü nükhia mali asü südi. Alima nong alir nuburtemi example tulu agitsüla ta bilemer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Short Biography

of

SUBONGNUKLU OZÜKÜM



US Capitol nung Billy Graham indang kürakyanglu semzükogo



May 16, 2024 nü US Capitol, Washington nung sayutsüngir Rev. Billy Graham kürakyanglu semzükdang (abelen nungi) North Carolina Governor Roy Cooper, Senator Ted Budd, R-N.C., Republican Virginia Foxx, R-N.C aser House Speaker Mike Johnson nungeri teka amaba noksa nung angur.

Washington, May 17 (Agencies): Brihostibarnü US Capitol, Washington nung sayutsüngir, asür Rev. Billy Graham indang kürakyanglu semzükogo.

Billy Graham-i Laishiba ka amer yangluba kürakyangluji National Statuary Hall telung nung saya. Iba sentong nungji House Speaker Mike Johnson, Governor Roy Cooper, taoba mapang tatong Tir Mike Pence, Congress züngsemtem, legislative züngsemtem aser Billy Graham'er kibong züngsemtem aden.

Yongmen in agi yangluba süklep 7 (metre 2.13) talang kürakyangluji Billy Graham nem akhüm tetushi agütsüba nüngtem nung yangluba lir.

Kürakyanglu semzükba sentong nungji jembidang Louisiana nungi Republican, Mike Jhonson-i, "America nunger puti otsü nung tang tatemsa Billy Graham-a pai alangzükba tesem nung ayur," ta ashi.

Johnson-isa Billy Graham-i pa akümüli nung alidang Khrista osangtajung sayutsüngiba

bilemteta jemb. "Billy Graham ya kü taküm nung mitsa talangka liasü aser asenok ajak atema pa ya mitsa ka liasü," ta Johnson-i ashi.

Graham tain akümbe sülen pa küm teimbaka Montreat nung ali aser 2018 küm pa arrshi küm 99 asüba mapang nung asü.

Alima puti otsü nung nisung teimtiba dang sayutsüngiba sayutsüngirji pa lir. Graham-i alima tesem balala nung nisung million 215 matsüngdang sayutsüngia liasü, ta Billy Graham Evangelistic Association (BGE)-i metetdaksü.

Pai tatembangbuba crusade agibaji 2005 küm New York nung liasü.

Graham ya US Tirtem-Dwight Eisenhower nungi tenzükba George W. Bush nunger atema adviser liasü. Pa tenzükba wadang ajanga tanela tsütsü dang masü saka yimtenren tsütsüa kongshi.

2015 küm North Carolina General Assembly-i bangzüng ka renema congressional committee dang National Statuary Hall nung Graham

indang kürakyanglu ka ayutsü asüngdanga liasü.

Kürakyanglu sayaba sentong nungji o jembirtemi Graham-i Khrista nem taküm rangben bendanga agütsür sayutsüngiba bilemteta jemb.

2018 küm Billy Graham arrshi küm 99 nung asüba sülen U.S. Capitol Rotunda nung akhüm agütsüba America nunger rongnung pezübubaji pa liasü. Pai küm 80 shi Tsüngrem tenzük, US Tir 12 nem counseling agütsü aser linük/territories 180 nung nisung million 215 matsüngdang sayutsüngia liasü, aser ibaji putiotsü nung sayutsüngi ajanga nisung teimtiba ayimjemba lir.

2013 küm pa arrshi küm 95 ajungba anogo nung pai America nungertem den tatembangbuba jembia liasü. Iba mapang nungji pai America nung tanela jenjang majungba atema sasaba olen ka nung, "Mapang kaka nungbo ni ajep, kechiyong ni yimti ka nungi ka semdangba mapang nung nüburttem aika Tsüngrem nungi talangka pilaba ni angu," ta metetdakja liasü.

Myanmar nung bomb agi Tenla ki ana raksatsü

May 17, 2024: Myanmar nung sepaitemi anünglen nungi bomb yokba ajanga Chin State kübok yimtsüng ka nung Catholic Tenla ki ka aser Baptist Arogo Tenla ki ka raksatsüogo.

Tonzang jila anasa Lungtak yimdak sorkar anema rarar lisopurtem meindoktsü atema May 11 nungi May 12 tashi sepaitemi anünglen nungi bomb amshia amak.

Sepaitemi anünglen nungi pokdaksüba bomb ji ajanga ki-pongu poksatsü.

Bomb agi raksatsüba Catholic Arogoji Kalay Diocese kübok lir. Iba Arogo nung putir, Titus En Za Khan-i anir Catholic Khristantem anasa aliba aremi jena oteta liasü.

"Rara ajanga civilian tem mejungi kongshir, talisa Kalay

diocese kübok Sagaing area nung nüburttem kanga timtemer," ta Khristantemi metetdaksü.

India aser Bangladesh na den arrtsülen aliba Chin state nung Khristan nüsüng teimba lir. Iba state nung Chin National Army (CNA) aser Zomi Revolutionary Army (ZRA) na densema lisopur telok balalai sepaitem den rarar.

Sepaitemi anünglen nungi bomb amshia kiojen, schools aser Tenla kitem amaker, aser ibaji ajanga nüburttem kanga timtemer, ta Chin Human Rights Organization (CHRO)-i metetdaksü.

Osang angazükba agi, Chin state nung Chin, Magwe aser Rakhine area nung lisopur telok balalai longjemer People's Defense Forces (PDF) tenteta

parnoki sepaitem ket nungi Chin Hills kübok Kyindwe jila densema tesem aika agiba mapang nungi tenzükba sepaitemi parnok anema sashia apusor.

2021 küm sepaitemi National League for Democracy (NLD) sorkar atsüngdokba sülen sepaitem yimsüsüba kübok iba linük nung rara manener.

Sepaitemi talisa Khristan nüsüng aika aliba states- Chin, Shan, Kachin aser Kayah nung Tenla kitem, Khristan organizations aser Khristan yimtsüngtem amaker.

Tawa lisopur telok 20 shi longjemer PDF tentetba sülen parnoki arrtsülen aliba states aser linük litsü shilem 50 shibo sepaitem ket nungi rakzükogo.

ANOGO ABEN TSÜNGREM DEN

Khristar Arogo

~ Mathi 16: 13:20

Item ya Yisui jembiba O tem lir. Pai "Kü arogo" ta jemb. Anungji asenoki Khrista meyong arogo ta jembir. Ibai Khrista meyong arogo süra, takok aser sentsüwangshi idakji lir.

Tarutsüji Khrista aser Pa nüburt meyong lir. Pa nüburtji shirnok? Telangzübaji tamanger telok ka mesüra arogo sobaliba nung alir ka masü. Tsüngrem nüburtji Khristantem lir. Anungji arogoji Khristantem, Tsüngremi alangzükba Tsüngrem nüburt lir.

Khristai Pa arogoji yanglu nung ibai Tsüngremi tentet, yimya teti alitsü aser nükjidong talangzükba ta asenoki amanger. Ibai Khristar arogo aser tanüa ibai tapet. Item ya shisadangang: Arogoji shiba meyong? Arogoji Khrista meyong süra tanelaren asenoki koba tashi o bendangtsü. Iba mapa nung asenok meimchiri koba tashi ataktetta yutsütsü? Arogo Khrista Kibur ta agizüktsü asenok renema lir ma?

Sarasadem: Shiri Ne dak temulung alemer parnok ajak peladakjang. T.Ken 5:11.

Tenangzükba: Ajiang, Kü tenzükertem pelashishia alitsü. Isa. 65:13.

Maranatha Baptist Arogo nung tang mezüng tetsür ka pastor shim



Rev. Ashley Guthas

May 17, 2024: Plains, Georgia nung aliba Maranatha Baptist Church nung Rev. Tony Lowden tongti pastor shimba sülen küm pongu shi lir iba Arogo nung tang mezüng tetsür ka pastor shimogo; iba Arogo nung taoba mapang US Tir, Jimmy Carter-a züngsem lir.

Rev. Ashley Guthas ya 2023 küm McAfee School of Theology nung graduate süa liasü. La mezüng Atlanta nung aliba Northside Drive Baptist Church nung tanur aliba kibongtem aser lanurtem atema associate minister inyaka liasü.

Yaküm August ita nung Northside Drive Baptist Church-i la shimba sangdonga liasü. Tamalen lai Methodist aser Baptist Arogo balala nung lanurtem rongnung tenzükba aruogo.

Taküm April 12 nü Northside Drive Baptist Arogoji jala ana tetsü, Guthas-i Maranatha Baptist Arogoji la nübo aginüa aiben asüngdang ta shia Arogo nung sodi meshi, ta metetdaksü.

"Ita ishika tejaklen ang ni

yangi (Northside Drive Baptist) züngsem ka aküm, aser kü taküm nung timtem koktettsü merangba mapang ka liasü. Kü nübo aginüa asüngdangba mapang nung ni lenla ana nungi asadanga liasü. Kaji yangi associate minister inyaksü aser kaji Plains, Georgia nung aliba Maranatha Baptist Church nung tongti pastor inyaksü liasü. Sarasadema shisadangba sülen ni yangi nenok (Northside Drive Baptist) den ang alitsü telemtetba agia liasü," ta lai tamalen metetdakja liasü.

Ajisüaka lai Maranatha Arogo dang la telemtetba metetdaksüba mapang nung parnoki la dang sangkümba Maranatha Arogoi arua tenzüktsü bilema liang, ta ashi.

"Ni parnok dang tangar nübo bushiang ta ashi. Ajisüaka Maranatha Arogoi kü nübo maneni asüngdanga liasü," ta lai ashi.

Tatemsai lai Maranatha Arogo nung tenzüktsü telemtetba agia taküm April 28 nü lai Northside Drive Baptist Church nung sodi meshia liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Süingsep

- (v) süing teküp ajaktokba (cutting of tree bark)
- * Alu nung süingdong tuluka onoki süingsepa toktsü.

Süingshi

- (n) teküp nung terunem menemba süingdong tapu ka (cinnamon)
- * Asen lima nungbo süingshi dong kangabo mangur.

OLONG PAITEP # 6790

		1		2				3		
								4		5
6									7	
		8				9		10		
11		12		13						
14										
				15						

TIPIEN

- 1. Tachitsü majung - 5
- 4. Mejang - 4
- 6. Sati nung tetsürla - 7
- 7. Arem tulu - 3
- 8. Sen-o-tsü - 7
- 11. Taleptsü yin - 3
- 13. Ajuzüa senzüba shiruru tila ka - 7
- 14. Tzü manung senzüba - 4
- 15. Kechaia malizüktet - 5

LANGTSÜNGLEN

- 1. Kotak _____ - 6
- 2. Tazüing / tambu - 6
- 3. Ozü senzüba - 4
- 5. Aou nung chiyungtsü asenba - 7
- 6. Pongentsür dang ajaba - 7
- 9. Sentep / lokti - 6
- 10. Aginüa reprang - 6
- 12. Tila tanur - 4

OLONG PAITEP # 6789 TELANGZÜBA


TIPIEN:

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN:

- 1. Tenükjang, 2. Luden, 3. Kiochtsü,
- 5. Lenti, 7. Tajangzük, 11. Teronem,
- 12. Sempa, 13. Jahaz.

NAI-A YA METETTER MA



- 1. Mitsüktsü dang nungibo moko tsüklokba 'lighter' ya mezüingbuba purapitet.
- 2. Nai nesasa ne teketsüla menaktsü makok.
- 3. Tzürangibo pasasa temeli juteta adokdaktsütsü makok.
- 4. Koya yabo kanga dang karaa züiner; ita 18 tsüingda koya ana dak nungi million ka shi jakzüktsü akok.

Manipur nung Kangleipak Communist Party züingsem 4 apu



Imphal, May 17, 2024
(Agencies): Manipur Police aser Assam Rifles yaritepa Kangleipak Communist Party (KCP) züingsem pezü puogo. "Osang tejangja ka angazükba nung ajemdaker Thoubal district kübok Yairipok Bazaar area nung mita aodang

telungpurtem apu" ta police ketdangsür kati ashi. Parnok ket nungi mobile handsets 5, 9mm pistols ana, demand letters 5, 5.56mm ammunition 20 aser 7.62mm ammunition pezü apu ta pai ashi.

Brihostibarnü Imphal West district nung KCP (Taibanganba) züingsem ka apu. Iba nisung yagi Paona aser Thangal bazar nung aliba dokantem nungi tashiyim agi sen saruba atema apu. Pa ket nung .32 pistol ka den injangtem ngutetogo.

May 31 nü Kaziranga National Park & Tiger Reserve shibangtsü

Guwahati, May 17, 2024
(Agencies): May 31, 2024 nü Kaziranga National Park and Tiger Reserve shibangtsü ta Eastern Assam Wildlife Division nung Divisional Forest Officer-i

Heritage Site nung 2023-24 tourist season tembangtsü. Tsüingsang majungba aser lenmang nung senzüsensong mesademba ajanga May 1 aser May 16 tashi Elephant aser Jeep Safaris shibangtsü ta mezüingbo metetdakja liasü.

Officer-i May 31, 2024 tashi Jeep Safari alitsü osang sangoktsüogo. Tan season atema Elephant Safari shibanger saka Jeep Safari meshibangba ajanga tourist temi Kaziranga National Park tobur ajung reprangtetsü.

Assam police-i Samaguri nung kiralongraba maparen ka makdok

Guwahati, May 17, 2024
(Agencies): Assam Police Special Investigation Team (SIT)-i Kanuwamari, Samaguri mita aodang kiralongraba maparen ka makdokogo. Police-i Matiur Rahman'er ki nung rangloker mita ao. Pai kiralongrar nem SIM cards aser taila kulikakettem agütsür ta temulung melemi bilemer.

Tan hopta tetenzüklen Guwahati railway station nung ABT züingsemtem Bahar Mia (30) aser Rasel Mia (40) ta apuba sülen Rahman puogo. Bangladesh senso ana ya ozüing alema India nung liyonga aru aser tenati taila India kulikakettem bener Assam nung kiralongraba maparen inyak.

aodang Matiur Rahman-i tongti süa yaritepba kulitem angu. Iba nung ajemdaker Guwahati nung SIT-i Rahman'er mita ao. Yaküm July ita police-i Rahman'er kidang nungi Aadhaar card-making machine ka apu aser iba ajanga pai taila kulikakettem yangluba kuli angu. Rahman ya ita ishika tejakdang ang tepuokdak nungi chioka liasü.

Rahman-i Ansarullah Bangla Team (ABT) den yariteper ta tai tonglokja lir. ABT ya Indian Subcontinent (AQIS) nung Al-Qaeda den sendaktepa lir.

Police-i Guwahati nung mita aodang taila Aadhaar aser PAN cards dena taitüsü aketba kulikakettem nguteta liasü. Police-i bushisüingdanga

Police-isa bushisüingdanga arudang Bahar Mia-i anogo 15 tashi Rahman'er kidang amongba bushitet.



Mizoram kübok Champhai district nung Indo-Myanmar Friendship Gate nung Zo Reunification Organisation (ZORO) ajanga lungkak aitba sentong ka agiba angur. India sorkari Indo-Myanmar arrtsü atsüandangtsüba sentong anema ZORO-i Zokhawthar yimtsüing nung iba sentong ayonga agi.

Office of the Akhoya Baptist Church TEPELA LEMSATEPER



Akhoya Baptist Arogo Office cum Guest House 17th May, 2024 anogo Rev. C. Bendang Jamir, Director GCYM ajanga meshitetba (dedication) sentong takok aser temoatsü nung agiogo. Iba ki yangluba mapang nung senso nübur, anükapang aser kija kibong aikati tenla agüja yaritepba ajanga mapang shitak nung mapa takok ngua tembangogo. Teyanglur Tsüngremi shilem agia arur ajak tali temoatsü südakjang ta arogoi sarasadema iba tepela osang sangdonger.

OFFICE OF THE YAONGYIMSEN VILLAGE COUNCIL TENÜNGSANG AGÜTSÜR

Yaongyimsen Village Council ajanga item nisungtem nem tenüngsang agütsür.



Er. P.I.MNA AO S/o Late Putimeren Ao & Late Tongjemsongla, pa tenzükba wadang nung temaba promotion ngua **Engineer-In-Chief under NPWD** jenjang ajangzükteba atema.



MISS NAROLA IMSONG D/o Shri. Rongsenwati Imsong & Mrs. Atula Noklen, **HSSLC (Science) Examination 2024** under NBSE tatidang nung **Top 1 Position** aser **State Subject Topper in Chemistry** jenjang ajangzükteba atema

Maneni HSLC aser HSSLC 2024 tatidang nung Kaketshirtem shirnokisa takok tajung nguogo nenok ajak nem Council ajanga tenüngsang tulu agütsür. Tarutsü anogotem nung nenok taküm aser wadang ajak nung Tsüngrem-i takokma nung azükarua moajangma ta sarasademtsür.

Sd/- NUNGSANGTOBA
Chairman
Yaongyimsen Village Council

Sd/- TONGPANG
Secretary
Yaongyimsen Village Council

SEMILAR ON NEW SUBSIDY POLICY & GST COMPLIANCES

Join Us for an Exclusive Seminar with **CA Saurav Sahewalla**,
Guwahati in collaboration with the
DEPARTMENT OF INDUSTRIES & COMMERCE,
Govt. Of Nagaland

EMPOWERING NEW INVESTMENTS & NURTURING EXPANDING ONES

UNNATI will elevate the region's infrastructure and facilitate skill development, laying the groundwork for sustainable and inclusive progress.

Date: 23rd May 2024
Time: 11:00 AM
Venue: Hotel Saramati, Dimapur

For Any Query Contact: 8787370262

Ukraine rara atema Putin-i China nungi teyari tali imlar

Beijing, Monupii/May 17 (Agencies): Ukraine nung military operation atema Beijing nungi teyari tuluba angutsü nükjidong nung Russia Tir Vladimir Putin-i par kidanger China linük sema jajaba tatemer. Ukraine amak tenzükba sülen Russia aser China tesendaktep tali tajungba kumogo aser Moscow indang rara nung Beijing-i yarir ta anüolen linük temi jembiba magizüker saka 2023 küm sen billion \$240 junga shishilemba liasü.

Putin-i anogo ana atema Russia semdangba tembanga Hokulbarnü Harbin yimti semdangba yagi linük ana tsüngta shishilempaba aser sobaliba tsütsü asendenshiba sayur, ta Chinese state news agency Xinhua ajanga ashi. March ita election agiba nung tanaben shimshir bendang limai mezüng aoba nung Putin-i Brehostibarnü Beijing tonga arua China Tir Xi Jinping den ajurutepa jembishinüa liasü.

Lenir ana ya Ukraine ken o kanga aroka shisadang aser Xi-i Ukraine ken o nung yimtenren tsütsü tangatettep kati arutsü asoshi China-i maneni inyakba indang jembi, ta Xinhua ajanga ashi. China-i Russia nem nok-nü aser injang-bomb magütsü aser taoba küm pari yimjung senton ka sayaba Ukraine aser par

Western allies temi aija liasü. Meilongi teti asoshi terenlok alitsü aser linük ana nüburtem tali ajangzüktsü aser alima security aser stability nung shilem agitsü atema Putin den maneni inyaksü, ta Xi-i shia liasü. Russia-i Ukraine den raraba mechi anüolen linük temi China dang Moscow yariba anentsü ajungshia arur. Shishilempaba tsütsü tesendaktep ajungkettsü mechi Putin-i Harbin semdang. Harbin yimti ya Russia den arütsü nungi kilometre noklang ishika pilar lir, aser ibai arütsü alema shishilempaba aser cultural exchange atema tongtipang tesem ka lir. Hokulbarnü Russia-China trade exposition lapokba sentong ka nung jembidang Putin-i linük ana tsüngta energy tsütsü tesendaktep aliba tushia liasü aser ano tashi itshitsü nanzük.

"Russia-i jenjang talang aser libajen tsütsü temürek energy ajanga China nunger rongsenketzüng, shishilempaba, yimti aser jila tem nem maneni tashi agütsütsü Russia renema lir," ta pai ashi. Pai osangbener den jembidang, Russia-i Ukraine idang Kharkive region amakba ya buffer zone ka adokdaksütsü atema lir saka iba region agitsü sentongbo mali, ta ashi.

Israel nem nok-nü agütsütsü US House nung bill ka agizük

Washington, Monupii/May 17 (Agencies): Gaza nung Hamas den raraba nung civilian tem kumzuka ayutsü asoshi mera tali agiang ta US Tir Joe Biden-i ajungshia aruba mapang Republican-i aniba US House of Representative ajanga Israel dangi nok-nü yoktsü atema bill ka agizükogo. Israel Security Assistance Support Act ya House of Representative nung züngsem 224-i mulung aser züngsem 187-i memulungi Brehostibarnü agizükogo. Republican timbai iba act bhukuma vote agütsüba nung Democrats 16 dena liasü aser Democrats timbai memulungi agütsüba nung Republican asem liasü.

Iba act ya ozüng akumtsübo meimlar, saka ya agizükba ajanga US nung election agitsü aliba küm ka nung Israel Ato Kilonser Benjamin Netanyahu indang sorkari Hamas züngsem samatsütsü merangba sentong nung US yimten yimsüsürtem telemsa adoka aliba ajiteter. Hamas teloki October 7 nü Israel amakdang nisung 1,200 shi tepset aser 250 dak tema

pua bener ao. Israel-i Gaza amakdang civilian 35,272 tepsetogo ta Palestine ketdangsür temi ashir. Chiyingsü shidak achijem masüba agi süngogo aser tzükumlen alir timba talidak ki maka aser ki o jen raksatsür lir. "Iba telemtetba yagi alima nung kanga mejungi kongshitsü. Ibai 'political calculation' ama inyak aser onoki yamai metoktsütsü," ta Republican House Speaker Mike Johnson-i Bodhbarnü külem party lenirtem den osangbener senden ka nung ashi. Democrats temia Republican temi politics asayar aser parnoki Israel nung Biden jenjang raksatsür ta ashir. "Ibai süoki ia inyakba ka masü, aser iba yongji House Democratic caucus nung Israel bhukumba züngsem timbai memulunger," ta vote magütsüdang House Democratic Leader Hakeem Jeffries-i osangbener senden ka nung shia liasü. Rafah nung nisung jenti asütsü aser Israel-i amaksü aliba nung timtem ajurutsü ta tangatetba nung Biden-i bomb agütsütsü aliba soita lir. Israel sepaitemi nüburtem lungsoa aliba tesemi ora Rafah nung taoba mapang amshia aliba nok-nü tem magütsütsü, ta Biden-i May ita tetenzüklen shia liasü. US tesem balala nung rights advocates, ozüng yanglurtem aser longkak aiter temi nok-nü agütsüba anentsü atema takhangba agüja arur aser item nok-nü ya human rights anema aser Gaza nung war crimes nung amshir, ta ashir. Kasa mapang US mitkari Gaza anasa khen atema yanglua aliba pier ajanga teyari osettem tzükum leni bener ogo ta ashi. Anepdang 9:00 ako meta aid trucks tem tzükum leni bener aor, ta US Central Command ajanga X nung post ka ajanga ashi. "Linük balalai Palestine nunger civilian tem nem teyari talila agütsür aser item ya ajak humanitarian atema dang lir, aser US sepai kata zükum leni mao," ta post nung shia liasü. (Maneni tapak 8 nung...)

Nepal PM Prachanda-i confidence vote agitsü

Kathmandu, Monupii/May 17 (Agencies): Nepal Ato Kilonser Pushpakamal Dahal 'Prachanda'-i May 20 nü Parliament nung vote of confidence ka agitsü, koba ato kilonser menden nung mener ita 18 tsüngta pezüben buba alitsü, kechiaser coalition partner-i par sorkar yariba anena lir. Taoba mapang guerrilla lenir inyaka alisang Prachanda ya Communist Party of Nepal (Maoist Centre) nungi lir, koba House of Representatives nung party tulutiba jenjang tasembuba nung lir. Upendra Yadav-i aniba Janata Samajbadi Party Nepal ajanga May 13 nü sorkar bhukumba anenba sülen iba vote of confidence agitsü telemtetba ya agia liasü. Yadav ya deputy prime minister nungi anen aser par party ya sorkar nungi anizük. "Constitution indang Article 100 clause 2 nung aliba ama ato kilonseri vote of confidence agitsü," ta House of Representatives indang odongtar Dasharath Dhamala-i ashi. (Maneni tapak 8 nung...)

3 buba Women's Champions Trophy 2024 osang

Dimapur, Monupii/May 17 (TYO): Sovima Cricket Ground aser Nagaland Cricket Stadium, Chümoukedima nung May 17, 2024 nü 3 buba Women's Champions Trophy 2024 cricket asaya jangratema asaya liasü.

Iba anogo Sovima Cricket Ground nung Zungki Slingers-i kanga junga asayateta Tizu Warriors madak wicket 10 agi koka liasü. Iba asaya nung Zungki Slingers nungi Priyanka Karmakar-i runs 30 angu (not out) aser bowling nunga lai runs 19 agütsür wicket pezü agia Player of the Match sempeta ngua liasü. Slingers nungi wicket kata

mesamai over 14 nung runs 71 nguteta liasü. Illuneule-ia kanga junga asaya runs 19 (not out) nguteta liasü.

Tizu Warriors yagi over 22.4 nung runs 70 dang yangluteter asayar ajak out süa liasü.

Kasa anogo Nagaland Cricket Stadium nung Dhansiri Titans aser Chathe Dazzlers na tzüngsang majungba mechi asaya tema masayatet.

Iba asaya manendang Titans teloki 128/10 yangluteta liasü, kong Alemienla-i runs 74 (not out) yanglutet.

Dazzlers nungi Najmeen-i kanga junga asayateta runs 17 agütsür wicket pezü agia liasü.

Dazzlers-i over 11 nung runs 45/1 yangluteter lia asaya anentsüsa akum, kong Vipeni Awomi-i runs 13 (not out) yangluteter liasü.

Iba asayamung nung tetsür cricket asayartem sempet tajung maneni ajiteter, aser cricket asayartem tali jangrabangra repranger, ta asayamung ayongergeri ashi.

Iba asayamung indang osangtsüsang maneni social media sapang, Instagram: @nagalandcricketassociation, Facebook: @Nagaland Cricket Association, X: @NagalandCricket aser YouTube: Nagaland Cricket Association nung angu.

Kohima district nung Pre-Subroto Tournament ayongtsü

Dimapur, Monupii/May 17 (TYO): District Sports Officer, Kohima Zhopovi Zecho ajanga Kohima district kübok kaket reju ajunga dang sangdong ka nung ashiba agi, District Sports Office Kohima ajanga IG Stadium Kohima nung May 29 & 30, 2024 anogotem Under-15 teburtem asoshi Pre-Subroto Tournament (District Level) Football ayongtsü.

Iba asayamung nung shilem agiba team nung asayar ajak kasa school nungi asütsüla. Selection ya 'first come first' yimya nung alitsü, kong mezüng teams (school) 8 nem District

Level nung shilem agitsü maongka agütsütsü.

Schools/Institutions nungi iba asayamung nung shilem agirtem ya arishi küm 15 tekübok asütsüla (January 1, 2010 sülen asor) aser kaketshirtemi Birth Certificate/Aadhaar Card (ajak original) bena alitsüla, ta sangdong ajanga ashi.

Kohima District kübok jangra aliba Schools/Institutions temi May 20-25, 2024 anogotem districtsportsofficerkohima@gmail.com dangi email asütsü mesüra 7005088728 nung tongtepratepsüla, ta ashi.

Brazil nung 2027 Women's World Cup asayatsü

Bangkok, Monupii/May 17 (TYO): Belgium, Netherlands aser Germany (BNG) lungjemer 2027 Women's World Cup asayamung ayongzüksü merangaka Brazil-i takok nguogo.

Hokulbarnü Bangkok nung FIFA indang congress alidang Brazil bhukuma vote 119 aser BNG bhukuma vote 78 agüja liasü, koba open vote ajanga iba asayamung ayongtsü temeden agütsüba mezüngbuba alitsü.

Aser South American linük kati Women's World Cup ayongzükba ibai mezüngbuba alitsü..

"Congratulations to Brazil," ta FIFA tir Gianni Infantino-i ashi.

"Brazil nung World Cup tajungtiba alitsü. BNG bid

atema kanga pelar."

Telok anaprongi iba asayamung ayongzüksü criteria tongtet, saka FIFA bid asadanga report nung stadiums, anisüngzükdak, fan zones aser transport densema technical tsütsü Brazil jenjang tajungba liasü.

United States aser Mexico lungjemer iba asayamung ayongtsü bid agüja aliba April ita agien aser parnoki 2031 atema ang rangloktsü ta ashi aser South Africa-ia November ita kasa inyaka liasü.

"South American tetsür football aser tetsürtem asoshi asenok takok ka benjongtsü ta meteta liasü," ta Brazilian Football Confederation tir Ednaldo Rodrigues-i ashi.

"Tetsürtem atema World

Cup tajungtiba onoki asayatdaksütsü, aser yangji nenoki temulung ajema teli."

Brazil indang bid team nung operational manager Valesca Araujo-ia, "Onoki linük atema dang masü continent atema temelenshi ka arutsü inyaker," ta ashi.

Brazil nung teburtem World Cup ya 1950 aser 2014 nung asaya liasü.

10 buba Women's World Cup ya 2023 küm Australia aser New Zealand nung ama team 32 format nung asayatsü, kong final nung Spain-i England madak takok ngua liasü.

Taoba mapang iba asayamung ya China, Sweden, United States, Germany, Canada aser France linüktem nung asaya lir.

FIFA-i Israel nokdangtsü telemtetba magiteter

Bangkok, Monupii/May 17 (Agencies): International asayatem nungi Israel anenja atatsü atema Palestine-i asüngdanga lemtetsü asoshi July ita mayongtepdang legal advice bushitsü, ta alima nung football asaya azüokba telok, FIFA-i ashi.

Gaza nung raraba mechi Israel Football Association (IFA) ajanga FIFA statutes nung aibelener aser Palestinian territory nung aliba team tem par domestic league nung inoka asayadaksür ta Palestine Football Association (PFA)-i ken o benokba sülen Hokulbarnü Bangkok, Thailand nung iba lokti annual congress alidang FIFA Tir Gianni Infantino-i iba sentong ya sangdonga liasü.

"Ni nenok dang puti otsü shidakba nung nokdaksü asüngdang... Tang mesüra kodang? Item aibelen mesüra Palestine nung kin ajunga samatsütsü merangba nung FIFA ajem-ajema melitetsü," ta züngsem 211 aliba delegates tem dang PFA tir Jibril Rajoub-i ashi.

PFA-i asüngdanga asem ya asadangtsü atema tang

asoshi FIFA-i independent legal expertise tem bushitsü aser FIFA indang statutes yimya shidak nung amshitsü aser July 25 nü extraordinary council senden amentsü, ta Infantino-i ashi.

Iba tenokdanga ya dangar ajungba nung tamang makai pei ajungtsü atema dang jangrar ama lir ta Israel-i ashi.

Bangkok nung iba congress aser council senden amentsü ita ka lia FIFA documents sayaba nung, PFA-i Israeli team tem anema tang nungi tenzuka tapet tenokdanga agütsütsü akhanger, ta shia liasü.

Motion nungya Palestine aser talisa Gaza nung Israeli occupation ajanga international law nung aibelener aser FIFA indang statutory ya human rights atema aser discrimination anema lir, ta shia liasü.

Gaza nung football dak sendakba ki o jen ajunga samatsüoggo mesüra kanga mejungi raksaja lir aser yangji otsü aluba al-Yarmouk stadium dena lir aser Algeria, Iraq, Jordan, Syria aser Yemen federations temi benokba

motion bhukumer, ta PFA-i zülü.

Palestine nung football asayar kibongtem densema Palestine nung timtem jenti ajurur, ta Rajoub-i ashi.

Pai tenokdanga agütsütsü asüngdanga ajanga pa amokmerenogo, ta pai ashi.

"Ni iba ken o magienra tepuokdak ayutsü ta Israeli Minister of Foreign Affairs ajanga ni amokmerener, saka alima nung tashi kecha-ia ochi lenmang menokdangtsü," ta pai ashi.

Ajisüaka Israel nungi külem züngsem Shino Moshe Zuares-ibo ozüng kecha meraksa aser iba ken o ya football den sendaktepa mali ta ashi.

"Israel yirutsütsü mechi PFA-i maneni dangar ajungba nung tamang makai pei ajungtsü meranger," ta pai ashi.

"Israel, Palestinian Authority aser alima tesem balala nung asayartem asoshi iba asaya tajungba akumtsü teimla nung ni aremzüker."

Asian Football Confederation tir Sheikh Salman bin Ibrahim Al Khalifa-ia Palestine-i benokba ken o bhukuma liasü.

BENDANGLI OSANG : Tapak 7 nungi...

Nepal PM Prachanda-i confidence...

Ato kilonser indang office aser Council of Ministers temi Parliament Secretariat dang iba indang osang metetdakja shiti ka zülüokogo, ta Dhamala-i ashi.

Ato kilonser indang party sadangra mesüra coalition sorkar nung züngsem ainshira anogo 30 tsüngta ato kilonseri vote of confidence agitsüla.

Janata Samajbadi Party (JSP) yagi taoba hopta coalition sorkar yariba nungi ainshia liasü. Ibai Ato Kilonser Prachanda aoshi küm ka ser tesadang nung vote of confidence pezüben buba alitsü shiba December 25, 2022 nung ato kilonser akum.

Vote of confidence nung takok angutsü asoshi züngsem 275 aliba House of Representatives nung vote 138 bo angutsüla. March 13 nunga ba ama vote agitepba nung Prachanda-i takok ngua liasü.

Tir election nung opposition party tongtipa yariba mechi

mangatetep adokba sülen taoba ato kilonser KP Sharma Oli-i aniba CPN-UML ajanga Prachanda-i aniba sorkar yariba anena taoba küma floor test ka agia liasü.

January 2023 nung vote of confidence agidang Prachanda-i vote 268 angu, aser kasa küm March ita agidang vote 172 ngua liasü. Floor test tasembuba agidang pai vote 157 dang ngua liasü.

Senotsü meshidak amshiba ken o nung Home Minister Rabi Lamichhane dena lir ta tai tonglokja ken o bushisüngdanga mapang ka nung iba vote ya agitsüsa akumer.

Tang ruling coalition-i menden timba ngua lir, kong CPN-UML meyong menden 77, Maoist Centre menden 32, Rastriya Swatantra Party menden 21, tang tasen tentetba Janata Samajbadi Party menden tenet aser CPN- Unified Socialist (CPN-US) menden ter lir.

Israel nem nok-nü agütsütsü US...

Anogo ishika tsüngta teyari oset 500 tonnes shi Gaza-i aitsü imlar, ta US Central Command-i ashir.

Iba pier (tzüma nung pongdaka aliba lenmang) yangluba nung US sepaitem den külemi British sepaitemi yaritepa liasü, ta Ministry of Defence ajanga ashi.

"Gaza tzükum nung yanglua aliba pier ya ajanga humanitarian aid truck aika Palestine nung dangi aotsü," ta Defence Secretary Grant Shapps-i ashi.

Gaza nung teyari agütsütsü atema US-i hopta ishika tejakdang iba pier ya yanglua liasü. Teyari oset tonne noklang aika Bodhbarnü Cyprus tonga aru, kong kanga junga screening agiba sülen peir nun goa yutsütsü atema shishilempaba rong nung inoka liasü.

Lorries pongu nungi 15

tsüngta bentetba US military rong tem nung item ya tzüma nung pongdaka aliba pier bushia bener aotsü. Pier ya metre noklang aika talang aser Gaza nung aliba tzükum nung metenloka lir.

Item lorry ya pier nung aotsü aser tzükum nung aliba marshalling yard nung teyari osettem ya yutsütsü.

Iba sülen UN aser talisa World Food Programme ajanga belenshia lemtsütsü ta ketdangtsü temi ashir.

Gaza nung Palestine nung million 2.2 shi chiyongtsü, jenokdak tesem aser danga teyari nungdaka lir.

Gaza nem ali len nungi teyari oset bener oa agütsütsü lendong lir, kechiaser mapang ka-ka aid convoy ya gangs temi rakzükrakteper aser teyari kanga nungdaka aliba civilian temi senbanger.

BILEMDANGANG
"Tatembang ajakji tetenzük tasen ka lir."